

Alþingi
Atvinnuveganefnd

Akureyri, 09.04.2018

Efni: Umsögn um drög að frumvarpi um breytingu á lögum um stjórn fiskveiða nr. 116/2006 (strandveiðar)

Vísað er til erindis sem barst Fiskistofu hinn 26. mars sl. þar sem óskað er umsagnar um ofangreint málefni.


Fiskistofa telur ákveðna mótsögn í 2. mgr. 6. gr. a núverandi laga og nýja bráðabirgðaákvæðinu í frumvarpinu. Í 2. mgr. 6. gr. a er talað um að Fiskistofa skuli stoppa veiðar ef heildarmagni mánaðarins á hverju svæði er náð, en í bráðabirgðaákvæðinu er talað um að Fiskistofa skuli stöðva strandveiðar þegar sýnt er að heildarafli strandveiðibáta fari umfram heildarmagn ársins skv. almennu reglugerðinni 607/2017. Miðað við þetta má ganga út frá að bæði ákvæðin gildi og því verði stoppað í hverjum mánuði eftir að magn mánaðarins klárast. Það þýðir í raun áframhald núverandi kerfis, nema að dögnum sem skip geta veitt á svæðum þar sem magnið klárast ekki, myndi fækka, og líklegt að það verði meiri afgangur í lok fiskveiðiársins. Ef aðeins er miðað við bráðabirgðaákvæðið þá hefði hvert skip leyfi til að veiða í 12 daga í hverjum mánuði, óháð heildarmagni og svæði þar til heildarmagnið er búið. Almenn er veiði betri fyrstu mánuðina á ákveðnum svæðum og því yrði mikil ásókn í að stunda veiðar á þeim svæðum og þeir sem eftir eru á hinum svæðunum fá minni veiði.

Fiskistofa telur þessa stöðu óljósa, þar sem ljóst þykir að ekki sé hægt að miða við mánaðarlegt magn og árlegt magn á sama tíma.

Fiskistofa telur það ekki skýrt miðað við framkomið frumvarp hvort áfram verði miðað við svæðaskiptingu þá er kemur fram í 2. mgr. 6. gr. a laga nr. 116/2006, eða hvort af því verði látið. Mikilvægt er að það verði skýrt.

Fiskistofa telur jafnframt mikilvægt að hugsað verði út hvernig fara eigi með óskir aðila um undanþágur, ef bátar bila eða verða af öðrum ástæðum óvirkir til veiða, eða í þeim tilfellum þar sem heildarafli mánaðarins er búinn áður en aðili nær sínum 12 dögum. Fá aðilar þá leyfi til að fjölga dögum í mánuðinum á eftir eða á næsta tímabili, eða fellur sá réttur aðila niður við hver mánaðarmót?

Fiskistofa vekur athygli á 4. mgr. 6. gr. a laga nr. 116/2006, en þar segir að frá útgáfudegi strandveiðileyfis sé fiskiskipi óheimilt til loka fiskveiðiárs að stunda veiðar í atvinnuskyni samkvæmt öðrum leyfum. Þegar aðilar hætta strandveiðum eiga þeir ekki kost á annarri veiði fyrr en 1. september. Upp gæti komið sú staða að aðilar verði búnir með það magn sem þeir mega veiða vel fyrir 1. september, þá sé staðan sú að fjöldi báta er með strandveiðileyfi en engar heimildir til veiða fyrr en 1. september.



FISKISTOFA

TRUST - FRAMFERNI - VÆÐING

stími 569 7900 • fax 569 7990

fiskistofa@fiskistofa.is

fiskistofa.is


Fiskistofa bendir jafnframt á að í lokamálslið bráðabirgðaákvæðisins segir að hverju strandveiðiskipi sé heimilt að landa ufsa sem VS-afla, og teljist sá afli ekki til hámarksafla skv. 5. tölul. 5. mgr. 6. gr. a.

Það er ekkert sem heitir VS afli í lögnum þó það gangi almennt undir því heiti. Fiskistofa leggur til að notaður verði sambærilegur texti og er í 9. mgr. 11. gr. laga nr. 116/2006.

Fiskistofa er reiðubúin að funda um efni umsagnarinnar, sé eftir því óskað.

F.h. Fiskistofu

Margrét Kristín Helgadóttir



Margrét Kristín Helgadóttir